



Naqqiut

(Siunnersuut Bendt B. Kristiansen-imit nanginneqassaaq)

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqummiuppara.

Naalackersuisut UKA 2017-mut inuit nunaqarfinni, illoqarfinnilu mikinerni illuliornissamut aningaasaliiffigineqarnissaminnut pitsaanagerusumik periarfissaqalernissaat pillugu pilersaarusoqquullugit Inatsisartut aalajangiiffissaattut siunnersuut.

(Inatsisartunut ilaasortaq Bendt B. Kristiansen, Inuit Ataqatigiit).

Tunngavilersuut

Nunatsinni pisortat inissaqarniarnermut annertuumik isumalluutigineqarlutik inissisimapput. Taama ittoqarneranut ilaatsigut patsisaaqataavoq nammineerluni illutaarsinnaannermut periarfissat nalinginnaasuusussaagaluit innutaasut ilaannut inornartumik inissitaammata.

Nammineq pigisamik pigiligariumaakkamilluunniit najugassaqaarneq inuup inuunneranut toqqissinartumik siunissaqartitsisartoq qularnanngilaq. Tamatuma illua tungeraa, pigilinngisaannagassamik akilersuiuartariaqarneq tamakkiisumillu inigisamut akisussaasuussutut imminut isiginnginneq.

Nunatsinni siunniunneqartariaqartoq tassaassoraarput innuttaasut nammineerlutik pigisaminnik illuuteqalersinnaanerisa nunatsinni tamani tamakkiinerusumik periarfissarsiunneqarnissaat, tamannalu ilaatigut aaqqissuunneqassasoq illoqarfinni anginerneq sisamani ullumikkut aningaaseriviit, kreditforeningit, periarfissarititaannut assingusoq Namminersorlutilli Oqartussat aaqqissuussaannik nunatta sinnerani tamani periarfissaasusaaq.

Nunatta sineriaani inoqarfinni amerlasuuni aamma illoqarfiit anginerit avataanni, aningaasarsiorluartoqartoq ilisimaneqarpoq. Aalisarneq nunatta aningaasaqarneranut isumalluutaanerpaasoq arlalippassuarni ingerlalluarluni aningaasarsiorfiuvoq. Isumaqarpugut nunatta pisuussutaat, aningaasanik kaaviiartitsiviulluartut atorluarlugit, nunatsinni tamani illugissaarnermut aamma atorneqarnissaat periarfissagissaarfiunerusariaqartoq aamma illoqarfiit angisuut sisamat avataanni.

Nunarput najugaqarfigiuagassatut isigigatsigu siammasissumik ineriartorfiusinnaanera aqutissiuunneqartariaqartoq isumaqarpugut. Taamaaliunngikkutta ullumikkut takussaaleriartuaalereersoq inoqarfiit amerlasuut unittooriartornerat aserfallattoqariartuaarneralu sukkatsikkiartuaartumik ingerlalissammat, inuiaat ilarpasuunut piitsuussusermik nassataqarumaartusaaq.

Kissaatigigatsigu nunatsinni ineriartorneq uagut maani pisariaqartitsinerput aallaavigalugu ingerlanneqassasoq, ukiunilu makkunani illuliornermut attartorfiusinnaasut nunatta avataanniit periarfissiissutit tamakkiisumik inuiaat pisariaqartitsinerannut naammassinninngimmata, Namminersorlutik Oqartussat ersarissumik iliuseqartariaqarnerat pisariaqavissutut isigaarput.

Ukiorparujussuannngortuni nunatsinni equngasutut isigineqartoq tamaniilli aaqqiissuteqarfigineqartariaqartutut eqqaaneqartuartartoq maannakkut alloriarfigineqartariaqalerpoq.

Aningaasatigut ingerlatsinikkullu pisortanut kingunerisassai

Pilersaarutip piviusunngortinniarnernanut naatsorsuutigaara ukiup affaanik sivilissuseqassasoq, tamatumali kingunerissallugu atorfillip AC-usup akissarsiaqarfissaa kr. 250.000-nik nalilik annertussuseqartussatut naatsorsuutigineqarsinnaassasoq.

Namminersortunut aningaasarsiornikkut allaffissornikkullu kingunerisassai

Pilersaarusionerup ingerlanerani tamanna namminersortunut pisussaaffiliiffiunaviangilaq. Namminersortut iluaqutigisinnaajumaarpaat illoqarfiit anginerusut sisamat avataani suli suliassaqarnerulersinnaanera, tamatumali nassatarisaanik sanaartornermut tunngatillugu suliffissaqartitsiniarnikkut iluaqusiisoqarsinnaanissaa alloriarfissanngussammat. Illoqarfinni mikinerusuni nunaqarfinnilumi aningaasarsiornikkut periarfissat annertusinerisigut ineriartortitsinermit iluaqusiissalluni.

Innuttaasunut aningaasarsiornikkut allaffissornikkullu kingunerisassai

Piareersaatit ingerlanneqarneranni tamanna innuttaasunut sunniuteqarnaviangilaq.